

Xojon carta-la San Pablo xi kiskii-la xita naxandá-la Cristo xi títsajna Colosas

*Kó tsò Pablo nga síhixat'aà jñà xita naxandá-la
Cristo xi títsajna Colosas*

¹⁻² Jñò xi xita naxandá-la Cristo 'mì-nò xi ján titsajnaà naxandá Colosas nga kixi onguít'aà-là Cristo, 'an xi Pablo 'mì-na ko 'ndsè Timoteo titsanihixot'aà-nòjen nga 'an tsibíxáya-na Jesucristo nga k'oas'ín kjòmejèn-la Nainá. Nainá xi Nà'èn-ná, ko jè Jesucristo xi otíxoma-ná kàtatsjá-nò kjondaà ko kjoa'nchán ya ijìin inima-nò.

Kó tsò Pablo nga tsjá-la kjondaà Nainá

³ Kjit'aà nàchrjein k'e nga nokjoàt'aà-lajen Nainá xi it'aà tsajòn, 'biì-lajen kjondaà Nainá xi Nà'èn-la Jesucristo jè xi otíxoma-ná.

⁴ Koií kjoa-la ngajen jyeé k'oas'ín kina'yà-jen nga ndaà mokjeiín-nò it'aà ts'e Cristo Jesús. Tíkoa matsjacha ngats'ìi xita-la Nainá.

⁵ Koií k'oas'ín 'nè-nò nga titsachiñá-là nga tjoé-nò kjondaà xi tíjnatjò-la Nainá ján ngajmii; koni s'ín kjòchíya-nò k'e nga kina'yà 'én ndaà-la Nainá xi kjoa ts'e Cristo xi nguì kjoakixi.

⁶ Tjje-ne jè 'én ndaà-la Nainá xi kjoa ts'e Cristo xi jye k'oas'ín kina'yà, 'ñó tínokjoáya nga tíjtsa isò'nde ko 'ñó kijin xita nchifatjìya-la kjòhítsjeèn-la koni s'ín komàt'ioòn jñò k'e nga jahatjìya-la kjòhítsjeèn-nò

nga jahas'en-jìin-nò kjondaà-la Nainá xi nguì kjoakixi.

⁷ K'oaá s'ín tsakóya-nò Epafras jè xita xi matsjacha-jen nga taña nixákjod-jen it'aà ts'e Nainá; nga jè Epafras, jngoò chí'nda-la Cristo xi kixi síxá xi it'aà tsajòn.

⁸ Jyeé tsibénojmi-najen nga jè Inima Tsjeè-la Nainá síkítsjeèn-nò nga ndaà matsjacha xita.

⁹ K'e nga kina'yà-jen, mìkìl nìjchàajiin-jen nga bìtsi'batjì-nòjen. K'oaá s'ín nìjèt'aà-lajen Nainá nga nguì ndaà kàtasíchiya-nò koni s'ín mejèn-la jè; jè Inima Tsjeè-la kàtatsjá-nò kjohítsjeèn ko kjoachjine.

¹⁰ Tìkooá nìjèt'aà-lajen nga k'oas'ín tijchá yijo-nò koni s'ín ok'in-la nga sùjchá yijo-la xi xita-la Nainá, nga kjit'aà nachrjein k'oas'ín t'een koni s'ín mejèn-la, nga k'oas'ín t'een ngats'ìl kjoa xi ndaà tjín ko nga isa ndaà jchaxkon yá-né xi Nainá.

¹¹ K'oaá tìs'ín nìjèt'aà-lajen Nainá nga tse nga'ño kàtatsjá-nò koni s'ín tjín nga'ño-la xi mìkìl fehet'aà, mé-ne nga kixi kìtsajna-nò nita mé kjoa xi sakò-nò, tìkoo s'e-nò kjoatsejta ko kjotsja.

¹² Tjii-là kjondaà Na'èn-ná nga jè kisikítsajnandaà-nò nga tìkoo tjoé-nò kjotjò xi jè jye tjindaà-la ján ngajmii ñánda iseèn choòn nga tsjá-la ngats'ìl xita-la xi ya chja-ne naxandá-la Nainá.

¹³ Nainá kisikítsajnandeíí-ná it'aà ts'e nga'ño-la xita neíí jè xi otíxoma ñánda jño choòn; yaá kisikítsajna-ná ñánda tíhotíxoma Ki'ndí-la xi 'ño matsjakeè,

¹⁴ jè xi ko jní-la tsibíchjítjì-ná nga kisikítsajnandeíí-ná tìkoo kisìjchàat'aà-ná jé-ná.

Jè Cristo tǐjna ítjòn-là ngats'ì xi tsejèn kò xi mìkì tsejèn

¹⁵ Nì saá jngò x̄it̄a beèxkon Nainá t̄anga jè Kì'ndí-là tsakó-là x̄it̄a yá-ne xi Nainá. Ngà jè Kì'ndí-là xi tǐjna ítjòn-là ngats'ì xi kisindaà ìsò'nde.

¹⁶ Nga kò Cristo, Nainá tsibíndaà yije xi tǐn nga-jmì kò xi tǐn ì it'aà nangui, xi tsejèn kò xi mìkì tsejèn, ngats'ì nga'ńó xi tǐn ìjìn ìsén, xi tǐtsajna ítjòn, xi otíxoma, xi xá ítjòn tǐn-là, kò j̄nà nga'ńó xi mìkì tsejèn-ná; ìt'aà ts'eé Cristo kisindaà yije-ne kò ts'e-né.

¹⁷ Cristo, ìsaá kjòtseé tǐjna mì k'oa-ne ngats'ì tsojmì xi tǐn, kò jè tsjá-là nga'ńó ngats'ì tsojmì mé-ne nga ndaà kǐtsajna-ne.

¹⁸ Jè Cristo tǐjna skò-là naxandá-là nga tǐjè-ne yijo-là kò ìt'aà ts'eé kjòts'ia-ne. K'e nga jaáya-là Cristo ìt'aà ts'e kjoabiyaà, jè tsibìjna ítjòn-là ìt'aà ts'e x̄it̄a xi faáya-là mé-ne nga jè kǐjna ítjòn-là n̄it̄a mé xi tǐn.

¹⁹ Nainá k'oaá s'ín kisaseèn-là nga jngò k'aá ya tsibìjnajìn yijo-là Cristo,

²⁰ nga ìt'aà ts'eé Cristo, Nainá tsajoóndaàkò yije-ne ngats'ì xi tǐn ìsò'nde kò xi tǐn ngajmì; ìt'aà ts'e jnì-là Jesucristo xi kixíxteèn ján ìt'aà krò, Nainá kisìkijne 'nchán kjoa.

²¹ J̄nò, nga s̄a ítjòn, t̄ikoaá tǐtsajnat'aàxìn-la Nainá; kondraá tsanguì-là ya ìjìn inìma-nò, koií kjoa-là nga ch'o tǐn kjoa xi kì'nè.

²² Tanga ì'nde jyeé ndaà tsajoókò-nò Nainá koií kjoa-là jè kjo'in xi kisìkjeín Cristo ì it'aà nangui k'e nga k'en. Koií k'oas'ín kis'ìin-ne mé-ne nga tsjeè kǐtsajnaà-nò, kò n̄imé jé xi s'e-nò kò n̄imé xi ch'o

kítjɔnguio nga nguixkɔn Nainá.

²³ Kjoa koi mochjeén-né nga kixi títajnakoo koni s'ín mokjeiin-nò. Kò kì binchat'aàxìn-là kjoa xi títachiñà-là it'aà ts'e 'én ndaà-la Nainá xi kjoa ts'e Cristo, 'én xi jye kina'yà-là. Jè 'én jè, xkì xi ján tìnokjoàyajìin-la xita kóhokji isò'nde; kò 'an xi 'mì-na Pablo, 'aán kjòngatsja nga okoòya 'én.

Xá-la Pablo

²⁴ I'ndeì matsjaá-na nga kjo'in tìsikjiaán xi kjoa tsajòn nga k'oaá s'ín tísíjngoaa ijìin yijo-na koni s'ín chijat'aà-na kjo'in xi kitsjaà-na Cristo xi kjondaà ts'e naxandá-la nga tije-ne yijo-la.

²⁵ 'Aán tísikjeén-na Nainá nga 'an tìsìxákoaa naxandá-la, xá xi kisingatsja-na xi kjondaà tsajòn nga nguì ndaà kènojmiá 'én ndaà-la,

²⁶ jè 'én xi tìjna'ma-la Nainá nga tisa tàts'en-la kjoa, tanga naxrjein i'ndeì, Nainá jyeé tsakó-la xita-la.

²⁷ Jè Nainá k'oaá s'ín kjòmejèn-la nga tsakó-la jña xita-la kó s'ín tìjn kjoa'ma-la xi 'ño jeya tìjna xi kjondaà ts'e xi mìtsà xita judío. Jè kjoa'ma, jè-né nga jè Cristo tìjnajìin inima-nò jño xi mìtsà xita judío 'mì-nò, k'oaá ma-ne nga títachiñà-là jño kjoajeya-la Nainá xi tsjá-nò ján ngajmì.

²⁸ K'oaá s'ín nokjoàyajìin-lajen ngats'ii xita it'aà ts'e Cristo; ñó nokjoàko-jen nga nguì kò kjoachjine okoòya-lajen mé-ne nga ngats'ii xita xi fít'aà-la Cristo nímé chijat'aà-la jè naxrjein k'e nga ngajen sìngatsja-jen nga nguixkɔn Nainá.

²⁹ K'oaá ma-ne nga 'ño tìbínè-la yijo-na nga tìsìxá, tìsikjeén jè nga'ño xi tsjá-na Cristo.

2

¹ Mejèn-na nga ndaà kàtasijìin-nò, nga 'ñó tìkjaàn-tji-nò ìt'aà tsajòn kò jñà xìtá-la Cristo xi tìtsajna ján naxandá Laodicea, kò ìt'aà ts'e ngats'ii xìtá xi kj'eè kii beèxkon-na.

² Koií k'oas'ín tìkjaàn-tji-nò mé-ne nga kàtas'e-la nga'ñó inìma-nò kò mé-ne nga jè kjòtsjacha xì tìjín-nò sìkìtsajnajtín-nò. Jè xi mejèn-na nga ìsa ndaà kòkixì kjòhìtsjeèn-nò nga nguì ndaà kochiya-nò jè kjoa xi tìjì'ma-la Nainá xi Na'èn-ná. Jè kjoa'ma jè, jè-né Cristo.

³ Nga ta jè Cristo tìjín-la ngats'ii kjòhìtsjeèn kò kjoachjine xi 'ñó chjì-la.

⁴ Koií k'oas'ín tìxan-nò nga mì yá xi skónachan-nò nga sìkìjeèn 'én xi ndaà tsò tanga mìtsà 'én kixì.

⁵ Nas'ín mìtsà yá tìjnako-nò, tanga inìma-na tìsìkìtsjeèn kjit'aà-nò. Matsjaá-na nga tì'be nga kixì tìtsajtìon koni s'ín onguíkoo yijo-nò tìkoo kixì tìtsajnaà nga mokjeiín-nò ìt'aà ts'e Cristo.

Kjondaà xi tìjín-ná nga Cristo tìtsajnakoáá

⁶ Koni s'ín kòkjeiín-nò ìt'aà ts'e Jesucristo xi otíxoma-nò, k'oáá tìs'ín kixì tìtjít'aà kjit'aà-là

⁷ koni jngoò yá xi nanga fì ìma-la kò koni jngoò ni'ya xi tìsindaàsòn-ìsa nga kàtakixiya jè kjoa xi mokjeiín-nò koni s'ín kichìta'yà; kò tjiì kjit'aà-là kjondaà Nainá.

⁸ Tìkindaa yijo-nò nga mì jñà skónachan-nò xita xi 'én ndiso chjá xi nì mé chjì-la. Jñà kjòhìtsjeèn koi, tà yaá nchrobá-ne ìt'aà ts'e xi taxkì xìtá koni tsò kjotíxoma xi tìjín ìsò'nde, mìtsà kjotíxoma ts'e Cristo.

⁹ Yaá tìjnajìin yijo-la Cristo yá-ne xi nguì jè sobà Nainá nga nìmé chijat'aà-la.

10 Nga Cristo titsajnakoo, tjin yije-nò nita mé xi mochjeén-nò. Jè Cristo otixoma-la ngats'ii nga'ño kò kjotixoma xi mikiì tsejèn.

11 Tikoáá it'aà ts'e Cristo kisit'aà chiba-nò kjoa ts'e circuncisión, tanga mitsà jè xi tsja xita bit'aà chiba-la yijo-ná, jè-né nga jè Cristo tsibit'aà chiba-la inima-nò k'e nga jaàxìn jé xi tjin-la yijo jé-nò.

12 Tikoá k'e nga komà bautizar, k'oaá ngaya-la koni tsà ya kisihjiin-t'aà-là Cristo xi kjoa ts'e jé-nò. K'oaá tis'in jaáya-nò koni s'in jaáya-la Cristo koií kjoa-la nga mokjeiin-nò nga'ño xi tjin-la Nainá nga komà kiskimittjen Cristo it'aà ts'e kjoa biyaà.

13 Jñò, nga sa ítòn, titsajnaà k'en-nò it'aà ts'e Nainá koi kjoa-la jé-nò nga jè Cristo kj'eè kii bit'aà chiba-la inima-nò nga faàxìn jé xi tjin-la yijo jé-nò. Tanga i'ndeji, Nainá jyeé kisikítsajnakon-nò kò Cristo nga kisijchàat'aà-nò ngats'ii jé-nò.

14 K'oaá ngaya-la koni tsà jye kisikjeheya-ne xojon xi kitjamì'nga xi kondra tsaján. Jaàxìn-ne, yaá tsohójnat'aà krò ñánda k'en-t'aà Cristo.

15 Jñà nga'ño xi tjin ijiin isén kò ngats'ii xi otixoma, Nainá jaàxìn yije-la nga'ño-la. Yaá kisikijne-la k'e nga jè Cristo k'en-t'aà krò. Kò ngats'ii xita, yaá kijtseè nga kisichja.

Kjotixoma-la xita xi mì kii fit'aà-la Cristo

16 K'oaá ma-ne jñò, kì kii nìs'in-là xita xi chjajno-nò nga tsò-nò nga mikiì nìkitasòn kjoa ts'e tsojmì xi chine, xi 'yò, kjoa ts'e s'e'ei xi bitjo, kjoa ts'e nga otsejèn xitse ijngoò k'a sá, kò ts'e nachrjein nìkjáya.

17 Ngats'iì kjoa koi, k'oaá ngaya-la koni tà 'nguién-laá kjoa xi iskan j'iì; tanga jè xi nguì kjoa kixi, jè Cristo.

18 Kì kii bìi'nde nga faáxìn-nò jè kjondaà xi jye titsajnajñò jñà xita xi beèxkón àkjale; k'oaá tsò-la yijo-la nga mìtsà xita 'nga ikon. Jè xi mejèn-la nga jñò k'oa tìs'in s'een. Jñà xita koi tsò-né nga inga nijñá kis'enojmi-la kjoa jè, kò 'ñó 'nga sikiítsajna yijo-la xi ta kjohítsjeèn ts'e, tanga nimé chjí-la.

19 Xita koi mìtsà ya ndaà fit'aà-la Cristo. Nga jè Cristo tìjna sko-la naxandá-la kò jè tsjá-la kjohítsjeèn kò nga'ñó kò jè sikiítsajnajtìn xita-la koni s'in ma yijo-ná nga jñà naxá-ná bítéya nindaà-ná, mé-ne nga ndaà sùxá-ne naxandá-la Cristo koni s'in mejèn-la Nainá.

20 Jñò, tañaá k'en-koo Cristo, k'oaá ma-ne nga mìkii tì tjí'nde-nò nga jñà sikitason kjotíxoma xi tjin isò'nde. ¿Mé-ne tákó k'oas'in 'nè-nò koni tsà kjoa ts'e isò'nde otíxoma-nò nga nikitason-nò kjotíxoma

21 xi tsò: “Kì kii nikoii tsojmi koi, kii chinii, kii ndseii niko-ne.”?

22 Jñà kjotíxoma koi, tà ts'eé tsojmi xi chija k'e nga tímochjeén. Tà kjotíxoma ts'e xita-né koni s'in okóya.

23 Jñà kjotíxoma koi, k'oaá s'in 'ya-la koni tsà tjin-la kjoachjine tanga mìtsà kixi kjoa. Nga síjé-ná nga ndaà sikitasoán kjoa xi 'in tjin mé-ne nga ndaà jchaxkoán kjotíxoma xi tjin-la ingo; tikoáá tsò-né nga mochjeén nga mì xita 'nga ikon komaá, kò nga kínè-lá kjo'in yijo-ná. Tanga jñà kjoa koi nimé chjí-la, nga mìkii ma osìko-ná nga nikiítsajnaá jñà kjoa ch'o xi síjé yijo-ná.

3

¹ Jñà kjoa tinchátsjioè kjondaà xi tjin ngajmii ya ñánda tjna Cristo nga ya tijnat'aà chrja kixi-la Nainá, koií kjoa-la nga ya jaáyakjoè-nò kò Cristo,

² Koií tikítsjeèn kjit'aà mé kjoa xi tjin ngajmii, kì koií nikítsjeèn kjoa xi tjin isò'nde.

³ Nga jñò, jyeé k'en kjoa ts'e isò'nde, kò jè kjoabinachon xitse xi tjin-nò nga ya titsajnakoo Cristo, yaá tijnatjò nga nguixkon Nainá.

⁴ Jè Cristo, jè-né xi kjoabinachon-nò; k'e nga jè xi kotsejèn ijngoò k'a, jñò, tikoáá yaá kotsejèn-koo nga jeya kitsajnaà.

Xi kjoa jchínga kò xi kjoa xitse

⁵ Tikítsajna kjoa ch'o xi síjé yijo jé-nò xi kjoa ts'e isò'nde: koni jñà kjoa chijngui, kò kjoa tjé kò kjoa ch'o xi sasén-la yijo-nò kò ngats'ii kjoa ch'o xi fahajii-nò, kò nga kjin tsojmì mejèn-nò. Kjoa jè tijé-ne koni tsà xkósòn yaxkón.

⁶ Koií kjoa-la nga kjo'in tsjá-la Nainá jñà xita xi mikì 'nchréñjon-la.

⁷ Jñò, tikoáá k'oaá tjin kjoa xi ki'nè kjòtseé k'e nga ya titsajnajñò kjoa xi ch'o tjin.

⁸ Tanga i'ndeí tikítsajna yije kjoa koi: jñà xi kjoa jti, kò jñà xi kjoa ts'en, kò jñà kjoa xi ch'o tjin, kò jñà kjoa xi nokjoàjno-la xita, kò jñà 'én xi ch'o tsò nga nokjoà.

⁹ Kì 'én ndiso nokjoàkoo xinguijo nga jyeé kich-jaàxìn-là yijo-nò kjoa jchínga-nò kò ngats'ii kjoa xi ki'nè nga sa kjòtseé.

¹⁰ Jyeé kichjoé xi kjoa xitse. Jyeé jahatjìya-la kjohítsjeèn-nò. K'oaá s'ín tímaxitseyà koni kji

isén-la Nainá xi tsibíndaà-nò skanda kóni nga ìsa ndaà jchaxkoòn yá-ne xi Nainá.

11 I'ndeì, mì tì kii 'ñó mochjeén-ne yá-né xi xitá griego, o yá-né xi xitá judío, yá-né xi tjit'aà chiba-la, o yá-né xi kjoa ts'e circuncisión, yá-né xi xitá xìn nangui-la kò yá xitá-ne xi ima tímajchá, yá-né xi chi'nda títina'ño, o yá-né xi títjandeí. Jè Cristo xi ìsa 'ño chjí-la; kò jè xi títjnajìn inima-la ngats'ì xitá-la.

12 Jñò xi xó k'oa'sín jaàjìn-nò Nainá kò xi ngui xitá tsjeè-la maà nga ndaà matsjakeè-nò, k'oaá s'ín chjoé xi kjoa xitse nga kàtahimacha xitá; kàtas'e-nò kjondaà; kì 'nga matakòn; indaàkjoa t'een; kò kàtas'e-la kjoatsejta inima-nò.

13 Nita mé kjoa xi títin-nò tikjeín-la xinguiò, tijchàat'aà-là xinguiò tsà mé kjoa xi ch'o síko-nò. Jñò, k'oaá títis'ín t'een, koni s'ín kisi'ko-nò Cristo nga kisi'chàat'aà-nò.

14 Jè xi títina ítjòn ts'e kjoa koi, jè-né nga títjsjacha xinguiò, nga jè kjoatjòcha xi ndaà síkítsajnajtín-ná.

15 Kjoa'nchán-la Cristo ndaà kàtatíxoma jìjìn inima-nò; nga Nainá xó k'oaá s'ín kiichja-nò nga 'nchán kítsajnakòo xinguiò mé-ne nga ta jn-goò yijo koma-nò. Kò mochjeén-né nga kjit'aà nachrjein tji-là kjondaà Nainá.

16 Jè 'én-la Cristo 'ño ndaà kàtasijìn kjit'aà ya jìjìn inima-nò. Takóya-là xinguiò kò tikixiyaà nga tikjeén kjohítsjeèn xi títin-la kjoachjine. Tijndá-là Nainá nga tji-là kjondaà xi títjìn inima-nò; tijndá-là sò ts'e salmo, kò sò xi jeya síkítina Nainá, kò sò xi ya nchrobá-ne ya jìjìn inima-nò.

17 Ngats'ìì 'én xi nokjoà kọ ngats'ìì xá xi 'nè, ìt'aà ts'e Jesucristo xi otíxoma-ná koat'een. Kọ ìt'aà ts'e Jesucristo tjiì-là kjondaà Nainá xi Na'èn-ná.

Kjoa xi mochjeén nga sùkitasòn xita-la Cristo

18 Jñò íchjín xi x'in tjín-nò, nangui titsajna-là x'in-nò koni s'ín ok'in-la jña xita-la Cristo.

19 Jñò xi íchjín tjín-nò, tjòcha jchaa íchjín-nò, kì toòn 'yaà.

20 Jñò xi ixti 'mì-nò, ndaà tìná'yañijon-là xita jchinga-nò, nga jè Nainá ndaà sasén-la kjoa koi.

21 Jñò xi Na'èn 'mì-nò, kì taxki sù nokjoàkoo ixti-nò mé-ne nga mì sikhajeèn-la ikon.

22 Jñò xi chí'nda maà, ndaà tikitason yije-là nei-nò ì ìt'aà nangui; kì tà k'ée nìxá k'e nga tìkotsejèn-nò nga ta jè xi mejèn-nò nga ndaà kitsajnakoo. Ngui koó inima-nò nga tikitason-là koi kjoa-la nga yaxkón Nainá.

23 Nita mé kjoa xi s'een, ngui koó inima-nò nga t'een koni tsà ìt'aà ts'e Na'èn-ná titsanìkitasòn kọ mìtsà ìt'aà ts'e xi taxki xita.

24 Jyee 'yaà nga jè Na'èn-ná Jesucristo tsjá-nò chíjì-nò nga tjoé-nò jè kjotjò xi tsjá-nò Nainá nga ixti-la maà koi kjoa-la nga jè titsanìxát'aà-là Jesucristo xi otíxoma-nò.

25 Tanga jè xì ch'o tjín kjoa xi s'ín, k'oaá s'ín kochjì-la koni tjín kjoa ch'o xì s'ín. Nainá mìtsà faájìin xita, ngàsòn ngáya fikọ ngats'ìì.

4

1 Jñò xi nei-la xá ma, ndaà tikoo jña xita chí'nda-nò koni s'ín tjín xi kjoa kixi, nga jñò 'yaà-nò nga tikoa tjín jngoò-nò xi Nei-nò ma ján ngajmii.

² Kì bìkjoà̀n-là nga nokjoà̀t'aà-là Nainá; kjit'aà nàchrjein tìtsajna daà nga tìnókjoà̀t'aà-là kò tji-là kjondaà Nainá.

³ K'oaá tìs'ín tìtsi'batji-nájen, mé-ne jè Nà'èn-ná kàtatsjá'nde nga koma kénojmí-jen 'én-la Cristo xi tji'ma-la Nainá nga sa ítjòn; nga koií kjoa-la nga ndayá tìjña'a'ya.

⁴ Tìtsi'batji-ná mé-ne nga s'e-na nga ñó nga ndaà kixi kichjàjìin-la xita koni s'ín tìjìnè-la nga kichjà.

⁵ Jñò, ndaà tìkjeén kjohítsjeèn-nò mé-ne nga ndaà kìtsajnakoo jña xita xi mìkìi beèxkon 'én ndaà-la Nainá xi kjoa ts'e Cristo. Ndaà tìkjeén nàchrjein xi tí'biì-nò nga kòs'ín tìkìtasòn.

⁶ K'e nga chikoo xita, jña 'én tìnókjoa xi ndaà tsò kò xi ndaà sasén-la mé-ne nga koma sìkátji-là 'én xi skonangui-nò.

Kó tsò Pablo nga síhixat'aà xita

⁷ Ngats'ìi kjoa xi tímat'ian, jè kènojmí yije-nò jè 'ndseé Tíquico xi 'an 'ñó ndaà matsjake nga jè ndaà síhixat'aà-na koo ndaà nìxákjoò-lajen Nainá.

⁸ Koií xá tìsìkasén-nò nga kènojmí-nò xi it'aà tsajen kòs'ín tìtsajna-jen kò mé-ne nga kàtatsjá-nò nga'ñó ts'e inìma-nò.

⁹ Tìkooá ya tìbáhijtakoo Onésimo xi xita tsajòn, xi 'ndsè ma it'aà ts'e Cristo. Nga xita kixi-né kò 'ñó matsjacha-jen. Jña kènojmí-nò mé kjoa xi tíma ijndé.

¹⁰ Jè Aristarco xi taña tìtsajnaya-jen ndayá, tìsíhixat'aà-nò. Kò jè Marcos xi ti xíkjin ma Bernabé tìkooá tìsíhixat'aà-nò. Jyeé kis'enojmí-nò it'aà ts'e Marcos; tsà ya kìjchòkon-nò, t'een kjondaà ndaà chjoétjò.

11 Tikoáá tísíhixat'aà-nò Jesús xi tikoá Justo 'mì. Tà jñà-né xi xitá judío xi mokjeiín-la xi k'oas'ín 'ño ndaà nchisíxáko-na it'aà ts'e kjotíxoma-la Nainá ko 'ño ndaà síjehikon-na.

12 Epafras, xi chí'nda-la Cristo, tikoáá tísíhixat'aà-nò nga xitá tsajòn-nò. Kjit'aà nachrjein bìtsi'batjì-nò mé-ne nga nguì kixì kitsajnaà koa ndaà kitsajnandaà nga sikitason mé xi mejèn-la Nainá.

13 'An, ndaà tìbe nga jè Epafras 'ño síkájno xi it'aà tsajòn ko it'aà ts'e xitá xi títajna ján naxandá Laodicea ko xi títajna ján naxandá Hierápolis.

14 Tísíhixat'aà-nò Lucas jè xi chjìnexkù xi 'ño matsjacha-jen, tikoá tísíhixat'aà-nò jè Demas.

15 Xi it'aà ts'an tiixat'aà-ná jñà 'ndsee xi títajna ján naxandá Laodicea, ko jè chjoón tichjaá Ninfa, ko ngats'iì xitá naxandá-la Cristo xi ya bixoña ni'ya-la.

16 K'e nga jye kíxkejìin-là xinguiòo xojon jè, tikoáá kàtaxkejìin-la naxandá-la Cristo xi títajna ján Laodicea; ko jè xojon xi ts'e Laodicea tikoáá tíxkejñoò.

17 Koatìn-la jè Arquipo: kàtasíkitason xá xi kitsjaà-la Cristo.

18 Nga jye tífehèt'aà xojon jè, koó ndsaa tikjii-nò 'an xi 'mì-na Pablo, nga tísíhixat'aà-nò. Tikítsjeèn nga ndayá tijná'ya. Jè kàtijnako-nò kjondaà-la Nainá. K'oa s'ín kàtama.

Mazatec, San Jerónimo Tecóatl
New Testament in Mazatec, San Jerónimo Tecóatl
Mazateco de S Jeronimo Tecoaatl; maa
(MX:maa:Mazatec, San Jerónimo Tecóatl)

copyright © 2012 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Contributor: Bible League International

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2012 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-10

PDF generated using Haiola and XeLaTeX on 10 May 2025 from source files dated 10 May 2025

9f778253-d34e-5037-af35-7bca16479aa0